

07/09/2003

PM hadir perasmian jambatan Kelantan

KOTA BHARU: Majlis Tindakan Rakyat Kelantan (MTRK) akan mengadakan sambutan besar-besaran pada perasmian Jambatan Sultan Ismail Petra oleh Sultan Kelantan yang juga sempena lawatan Perdana Menteri, Datuk Seri Dr Mahathir Mohamad ke Pasir Mas, 15 September ini.

Jambatan ketiga merentangi Sungai Kelantan itu akan diberi nama Jambatan Sultan Ismail Petra berharga RM166 juta dibina pada 1999 dan siap Mei lalu yang menghubungkan Pasir Mas dengan Kota Bharu.

Jambatan termoden di Kelantan itu mempunyai empat lorong, sekali gus mampu mengurangkan kesesakan di laluan Jambatan Sultan Yahya Petra dan Jambatan Salor.

Presiden MTRK, Datuk Ibrahim Ali, berkata sempena majlis itu beberapa acara diadakan termasuk persembahan kebudayaan atas rakit (rakit budaya) melintasi Sungai Kelantan, payung terjun oleh Angkatan Tentera Malaysia (ATM), tarik tali 200 orang sebelah dan lintas hormat kapal terbang Cessna.

Beliau berkata, semua persembahan itu akan disaksikan oleh Sultan, Raja Perempuan, Perdana Menteri dan seluruh pemimpin Umno Kelantan bersama rakyat.

Katanya, acara tarik tali dijangka dimasukkan dalam Malaysia Book of Record's sebagai acara membabitkan peserta paling ramai.